

GU UA'NA'N GU PAABLO NAT
TU UA'ÑXI GU
PILIMOON

Gu Paablo na ba ñio'kdha' gu Pilimoon

1 ¹ Aañ Paablo nañ pu kai'ñkam kuup nañ buiñor ti jii'gi'ñ guch Xoi'kam, tum ua'ñxidha' iñ biima'n guñ jaduun Timoteo aapi' Pilimoon nach joidham xim kiigalhi'ñ, nap gu' pu chu'm ka'm jup tu juan na jax aach. ² Biix jañ tu ja ua'ñi'ñ gui' nam mi'm ki'aam maap jum jumpadat daan guch Xoi'kam, pui' na jax gu Aapia gio gu Arkiipo nach maap jich dhakoo'ñdhatu' nach jax ja'k mi' pui' jiim na jax jix aa' guch Xoi'kam. ³ Ba' gu Dios jich Gi'kora' biima'n guch Xoi'kam pix jam a'm ti niidhidha' am na pim ba'x bhai'm taatit tu oi'ñka' biix ji'ma'n aapi'm.

**Gu Paablo na ba aagi'ñdha' gu Pilimoon na joidham jix
chu joi'mdat jix bhai' ti jii'gi'ñ buiñor guch Xoi'kam**

⁴ Aañ gammiji taxchaabgi'ñ gu Dios nañ jim ti'ñchoi jano' pik nañ pai' dhuuk tu daanda' buiñor, ⁵ nañ gu' pui' tē kēē nap sap joidham jix ja joi'mdat jix bhai' ja bua biix guch Xoi'kam jii'gi'ñdham na pim ji'k maap jum jumpadat daan gu Dios, gam nap sap tu' silhkam ki'n ti jii'ñdhat buiñor jix biiñak guch Xoi'kam. ⁶ Ba' aañ tu daan buiñor gu Dios jum a'mkam nax io'm jum makia' gu matda' nap ba'x bhai' machia' biix nat tu'ch a'm ji bii bhaankam guch Xoi'kam, nap gu' aap pu chu'm jup tu a'ga nach aach jax chu'm bhaan ti jii'ñdhat jix biiñak kat mi' pui' jiim. ⁷ Joidham jix bhai'ñ chaat iñ ba' nap jix ja joi'mdat jix bhai' ja bua guch jaaduñ jich Xoi'kam bhaan, joidham jiñ gugux jañich na ñich pui' ti kai. Cham tu' bhaan jax kam aa' am ip sap ba' biix guch Xoi'kam jii'gi'ñdham na pim ji'k maap jum jumpa'n, na mit gu' ba maat na tu'r jix kii'p jum duukam.

**Gu Paablo na pui' ba tiida' gu Pilimoon nax bhai'
aichdha' gu Oneesimo na mu joochxidha'**

⁸ Ba' sia kuñ moo tii ja'p ji buusan nañ jir ge'kam nañ jir nobii'ñ guch Xoi'kam, ba'x bhaagit nañ jix gi'm jix oo' ki'n tum chiñia' jax ñañ ilhii'ñdha', gu' ji nañ gu' aañ diilh cham pui' ilhii'ñ. ⁹ Xim joi'mdat soi'ñ ilhdhat jañ pix pui' xim tiidam, aañ Paablo nañ bax maat na jax ja'k jix bhai' ji chu buusnia' nap pu tu duñia', nañ gu' aañ mi' dhir ba jim, jagi'kat jañ jup jum titda. Ba' pu kai'ñkam ya' kuup iñ nañ ti jii'gi'ñ buiñor guch Xoi'kam. ¹⁰ Aañ bhaankam ñiok gu Oneesimo nat ii'mda'

bhaan ja'p ji buus na bar jiñ mar, nat gu' ba tu maat gux kii'p jum duukam nañ tu a'gi'ndha' ya' pui' nañ ji kuupich.

¹¹ Biipi' dir gu Oneesimo cham tu'x kii' tujuandam buus jum bui. Xib jix kii' tujuandam ba buus na ba' biix gook bar jich chujuandam tuk ka', aap gio aañ. ¹² Ba' xib jañ miji xim joochxidha' ip gio, pui'p ja'k ilhdha' na panaas aañ pix jir gui' ka' na bhammi ba aaya'. ¹³ Aa'ñ tiix aa' nam a'mkam ya' daakat jiñ palhbui'ndha' git biix aixim na tu'ñ a'm jum aagidha', na gu' aañ diilh cham bhaai' nañ tu' jax duñia' nañ kuup pu kai'ñkam pix nañ tu a'ga gux bhai'm kai'chdham ñi'ook na bhaan tu a'ga guch Xoi'kam. ¹⁴ Gu' ji na gu' cham jir am pui' nañ jax ilhii'ñ aañ, pui' kuñ ba' mum kēkēē nap ba' aap diilh jiñ aagi'ndha' no'p pui'p ilhii'ñ nañ jax kai'ch. Ku gu' cham tu' ji na moo nañ jum chianit jup kai'ch, gu' ja'pji aap diilh no'p pui'p ilhii'ñ. ¹⁵ Ja'p ji buus nat pu kai'ñkam pix mi' dhir jum o'ñxidhak mai' mii ji'k tanoolh gu Oneesimo na ba' mi' dhir na gio mup aaya', gammiji jum biim pu bap tui'ka'. ¹⁶ Ba' pui' pix ja'k jap jup ba ilhdha' na jax gu jai'ch jaaduñ jich Xoi'kam bhaan. Jix joi'mdat jap nii'ndha', cham tu'p pui' ja'k ka ilhii'ndha' na jax biipi' dir nap tujuandam ki'n ka bia'ka' pui' cham ji namkidhat. Jix kiigalhi'ñ iñ gu' aañ. Aap jum a'm jum aa' nap jix io'm jix dha'ram ilhii'ndha', cham tu' pui' na aañ, na gu' bar jix kii' maa'nkam, gio na pui'p bar jum jaduun na ba ti jiigi'ñ buiñor guch Xoi'kam.

¹⁷ Ba' nañ jax ba kai'ch, pui'p ja'k ilhdhai aichdha'm ki'aam na panaas aañ pix jir gui' ka', no'p dho ji pui'ñ ilhii'ñ nañ aañ jir jum jaduun jich Xoi'kam bhaan. ¹⁸ No't tu'x buam jum duiñ, piam ku tu' bhaan jum ua'tu'n, jiñ aagi'ndha' ap nañ aañ jum namkidha'. ¹⁹ Silhkam jañ jum namkidha', cham tu' nañ pui' pix kai'ch. Aa'ñi' Paablo nañ ya' tu u'uan dhi u'uan ta'm bhaan ya' pui' kai'ch. Sia ku gu' aap ja'p ji buusan nap jix io'm ge'ñ ua'tu'n, cham tu' ja'xbui' nañ ji'x jum chian nap puñ dhuiñdha' xib, ku gu' nañ gu' aañ dhi' bhaan cham tu'p kañ buixi'ñ. ²⁰ Ea nap pu duñia'ñ jaduun jich Xoi'kam bhaan. Soi'ñ ilhdhat jañ pum titda nap iam puñ dhuiñdha' nañ jax jum titda, nap gu' bax maat na jax ja'k jum aa' nach pu duñiidha' no'ch ba ti jiigi'ñ buiñor guch Xoi'kam. Dhi' bhaan jap xiñ guguxdha' nañ cham jax jiñ aa'nda'ñ jur am bhaan, nach gu' pu kai'ñkam bar jich jajaa'nnim jich Xoi'kam bhaan.

²¹ Jix maat iñ jiñ jur am bhaan nap mi' pui' tu duñia' nañ jax jum titda, pui' kuñ ba' mu tum ua'ñi'ñ. Jix maat iñ nap jix io'm jix bhai' mi' pu duñia', cham tu' pui' nañ jax jum aagi'ñ. ²² Gio ja'p jañ jup xim tiidam nap mi' dhir jix kii' xi chuñ dhuiñdha' mi ja'p pai'm ba'gir nañ mi aaya', na ba' gu' no't jotmoda' ma aa gu Dios nañ mu jam ti'i'mira', bax maati' ka' nañ pai' aaya', na pim gu' pui' ja'k soi' titda gu Dios.

Gu Paablo na ba tabuimgidha' gu Pilimoon

²³ Ya' dir mum ñio'ki'ñ gu Epaapras nach maap kuup pu kai'ñkam pix nach buiñor ti jii'gi'ñ guch Xoi'kam. ²⁴ Biix gu Maarkos ya' dir mum ñio'ki'ñ, gio gu Aristaarko, gio gu Deemas, gio ba' gu Luukas, nam pui'p jiñ palhbui'ñ nach bhaankam tu juan guch Xoi'kam.

²⁵ Ba' guch Xoi'kam nar gø'kam pix jam a'm ti niidhidha' gammiji biix ji'ma'n aapi'm.